

Un hialat halhaire en Comenge-Varossa

Eth divendres 19 d'octòbre, qu'èra organisada ena sala deras hèstas de Marinhac ua reunion ara iniciativa dera associacion Eth Ostau Comengés qu'a per especificitat era collecta e era transmission deth patrimòni culturau immateriau deras Pireneas Gasconas. Eth son objectiu : amassar eths actors que s'implican o qu'an hame d'implicà's ena valorisacion dera hèsta deth solstici d'estiu, era Sent Joan, arreconeguda patrimòni culturau immateriau dera umanitat pera UNESCO. Ara crida d'Eth Ostau Comengés, elijuts o associatius de mantuas comunas de Comenge e de Varossa qu'èran presents : Marinhac, Estadens, Herranh, Senta-Maria, Vots, Aspèth (Giròsp e Golhó), Sent-Martòri, Sòst, Sarp. Que s'èran excusats de non poder vénger era municipalitat de Gaudent e eths organisators dera Barta d'Arribèra.

Demèst eras personas presentas, uas quantas que perpetuan era tradicion deth « *brandon* » – que vau mes aperar *har* ou *halhar* – en manténguer un saber-hèr eretat deths vielhs. D'aites participants ara reunion qu'an tornat a lançar aquera practica pòc de temps a o que's pensan d'ac hèr en son territòri. Pr'aquò, en aquera aviada, que's pòsan questions d'òrde practic, institucionau e de contengut culturau : quin cau preparar eth arbe, quan deu èster cramat, quina(s) animacion(s) proposar en complement, quin transméter aquestes sabers e aquestes saber-hèr aths joenes ?

Qu'ei pr'amor d'aquò, conscients dera valor deth patrimòni culturau dera nòsta region e deras incidèncas beneficás que i pòt aver sus eth ligam sociau, era economia toristica, era educacion, eths participants ara amassada de Marinhac qu'an exprima era sua enveja de formar un hialat halhaire endà mutualisar eras informacions e eras competèncas, dambe un doble objectiu : tornar balhar sens ara Sent Joan e perméter aths abitants de tornà's apoderar aquera tradicion millenària.

Entà aver mes informacions sus eth hialat halhaire en Comenge-Varossa, que podetz contactar Eth Ostau Comengés : contact@ostaucomenges.org